

Sanhgyangh: Hozdung “Yezyej” Coux Bimoq

Bi’ gvaq 12 nyied 31 hauh, Sanhgyangh Dungcuz Swciyen Bazgyangh Cin Gauhmai Cunh Mbanjgveihco bae laeng Mbanjdung Yezyej banh aen hozdung “Yezyej”. “Yezyej” dwg cungj fungsug doxyau Mbanjdung, couh dwg bouxsai mehmbwk bouxlaux lwgnyez mbanj ndeu ciuq doxduenq bae daengz mbanj wng guh hek, cawjdaeuz riuz youq Mbanjdung giz gapgyaiq Gvangjsih、Huznanz caeuq Gveicouh. Gyoengqvunz song mbanj caez diuq foux caijdinvenz、angq diuq foux dohyeh、gwn ngaizbakranz daengj. Itmienh angq coux bimoq, itmienh caenhsim langhbaij lai cungj yienghndeih Mbanjdung, ciepcienz caeuq fatyienz le gij cienzdoengj vwnzva Dungcuz.

(Gungh Bujangh/龚普康)

► Gyoengqvunz Dungcuz doxdax boq venz, yienhcieingz nauhvied dangamaz.



Makhung Banggungz Venj Rim Yangh Yauz Myauz

Gyawj geij bi daeuj, Sihlinz Yen Cuzbez Yauzcuz Myauzcuz Yangh baengh gij vwnzva swhyenz minzcuz, hwngfat gij daegsaek canjnieb minzcuz. Seizneix, aen yangh neix gungh gungganq ok dangzrwi “Cuzmuzyauz” Mbanjbingzmuz、youzcaz “Cuzcejcuengh” Mbanjcejmoh caeuq mbawcaz “Cuzlungzcaz” Mbanjyangh-lungz daengj binjbaiz, miz 6 aen mbanj gij cunhcizdij ginghci de sou ndaej 10 fanh maenz ngaenz doxbae, byaij ok diuz roen minzcuz doxgiet caeuq duetgungz gunggeng doxgap ndeu.

(Veiz Vwnzsenh Vangz Lanzyingz Cwngh Dungh-meiz/韦文先 黄蓝莹 曾冬梅)



▲ Dahsau Yauzcuz langhbaij dangzrwi youzcaz daengj huq miz daegsaek haenx.

Yinhcwngz Gwnz Muengx Eu Fwen Cienz Sing Aendangj

Bi’ gvaq 12 nyied 31 hauh, Yinhcwngz Yen youq gwnz muengx banh aen hoih eu fwen bae hag gij cingsaenz Gaiq Daih Cibgouj Haj Cung Cienzhoih Aendangj. Fwenvuengz Laizbinh、Namzningz、Hozciz sam aen si youq gwnz muengx cigboq eu gij fwen vunz lai maij dingq、dingq ndaej rox haenx, dawz gij sing aendangj eu haeuj ndaw sim vunzbiengz bae. Caiqlij aeu cungj fuengsik daegbied neix angqhoh bi 2021 daeuj daengz.

(Fanz Saugvangh/樊绍光)

Bouxguh Hong Hen Ndei Vih Hong Gvaq Yenzdan



▲ Bouxguh Hong cingq youq yienh-cieingz guhhong.

1 nyied 1 hauh, yienhcieingz guhhong laeng Yungzanh Yen Fuzsiz Cin Gozdau G357, gyoengqvunz guhhong youq baihnaj haengrengz guh, hawj gyoengqvunz diegbya ndaej vaiqdi doeng roen gauhsuz. Ngoenzde dwg yenzdan, lij miz haujlai vunz yienghneix guhhong gaenxmaenx、hen ndei vihhong gvaq yenzdan, bingzcieingz hoeng cix maenh’ak raixcaix.

(Veiz Yungzginh/韦荣军)